

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 96/37

ք.Երևան

22 դեկտեմբերի 2023թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 01.12.2023թ. թիվ 05100033/291123/1381/6/1 որոշման դեմ ֆիզիկական անձ Էրիկ Խարատովի դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

Ֆիզիկական անձ Էրիկ Խարատովը (այսուհետ նաև՝ բողոքաբեր) հայտնում է, որ համաձայն 05100033/140723/0000832111/00 մաքսային մուտքի օրդերի՝ Վրաստանի սահմանը հատել է «MITSUBISHI-SPACE WAGON» մակնիշի, 1999թ.-ի արտադրության, JMBLNN84WXZ002880 նույնականացման համարանիշով ավտոմեքենայով 14.07.2023թ.՝ վճարելով մաքսային ծառայության վճար 23.07.2023 ժամանակահատվածը, որի երկարացման ժամկետի վճարման գումարը վճարել է «Ինգո Արմենիա» ապահովագրական ընկերության մաքսային երաշխիքի տրամադրման վկայագրով՝ համոզված լինելով, որ սահմանի հատման կարիք չի լինելու: Ոչ սահմանի ներս մտնելու ժամանակ և ոչ էլ գումարի վճարման ժամանակ չեն զգուշացրել, որ վճարումից բացի մեքենան պետք է ՀՀ սահմանը հատի և նորից ներս գա: Դիմում-բողոքին կցվել է համապատասխան վճարումների կրկնօրինակները:

Բողոքաբերը նաև նշում է, որ ներկրված մեքենան մինչև սույն թվականի սեպտեմբերի 28-ը անսարքության պատճառով վերանորոգման է գտնվել Թբիլիսյան խճուղի 29/33 հասցեում: Դիմում-բողոքին կցվել է տեղեկանքի կրկնօրինակը:

Ֆիզիկական անձ Էրիկ Խարատովը 26.09.2023թ.-ին դիմել է՝ ներմուծման ժամկետը երկարացնելու համար, բայց ստացել է պատասխան 02.10.2023թ. գրությամբ՝ «Մաքսային կարգավորման մասին» ՀՀ օրենքի 309-րդ հոդվածի առերևույթ խախտում, հարուցվել է վարչական վարույթ:

Բողոքաբերը նշում է, որ ներկայումս չի աշխատում, թոշակառու չի, ֆիզիկապես աշխատունակ չի: Խնդրում է հնարավորության սահմաններում ներել, քանի որ նմանօրինակ գումարներ վճարման ենթակա չէ:

Ֆիզիկական անձ Էրիկ Խարատովը խնդրում է անվավեր ճանաչել վերոնշյալ որոշումը և հետագայում թույլատրել երկարացնել ներմուծման ժամկետը:

2. Դիմում-բողոքի քննության համար էական նշանակություն ունեցող փաստերը

ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 01.12.2023թ. թիվ 05100033/291123/1381/6/1 որոշման մեջ մասնավորապես նշված է, որ ՀՀ քաղաքացի Էրիկ Միխայելի Խարատովը 26.09.2023թ.-ին դիմել է ՀՀ ՊԵԿ՝ հայտնելով, որ 2023թ.-ի հուլիսի 14-ին Բագրատաշենի մաքսային կետ-բաժնով, թիվ 05100033/140723/0000832111/00 մաքսային մուտքի օրդերով ՀՀ է ներմուծվել «MITSUBISHI-SPACE WAGON» մակնիշի, 1999թ.-ի արտադրության, JMBLNN84WXZ002880 նույնականացման համարանիշի, CC324II պետհամարանիշերի տրանսպորտային միջոց, որի ներմուծման վերջնաժամկետ է սահմանվել 23.07.2023թ.-ը: Խնդրել է ներմուծման վերջնաժամկետը երկարաձգել մինչև 23.07.2023թ.-ը:

02.10.2023 թվականին կազմվել է մաքսային կանոնների խախտման վերաբերյալ արձանագրություն: Վարչական գործի լուծմները նշանակվել է 25.10.2023 թվականին ժամը 15:30-ին, իսկ գործի քննությունը 01.11.2023 թվականին ժամը 12:30-ին, որի վերաբերյալ վերջինիս կողմից ներկայացված բնակության հասցեին ուղարկվել է ծանուցագիրը, սակայն ծրարը հետ է վերադարձել «անհայտ» նշագրմամբ, որից հետո դիմումատուի հետ հեռախոսակապի միջոցով ճշտված հասցեին է ուղարկվել նոր ծանուցագիր վարչական գործի լուծմների և քննության տեղափոխման վերաբերյալ, սակայն ծրարը վերադարձվել է «այլ» նշագրմամբ, քաղաքացու հետ կապ հաստատելուց հետո երրորդ անգամ ծանուցագիր է ուղարկվել վերջինիս տրամադրած «Whats App»-ին, որից հետո քաղաքացին ներկայացել է վարչական գործի լուծմներին և գործի քննությանը՝ համապատասխանաբար 30.11.2023 թվականին ժամը 15:30-ին և 01.12.2023 թվականին ժամը 17:00-ին:

Գործի նյութերի ուսումնասիրության ընթացքում պարզվել է, որ 14.07.2022թ. լրացված թիվ 05100033/140723/0000832111/00 մաքսային մուտքի օրդերով 9 օր ժամկետով, ՀՀ է ներմուծվել վերոնշյալ տրանսպորտային միջոցը, որի ներմուծման ժամկետ է սահմանվել 23.07.2023թ.-ը: Սահմանված ժամկետում տրանսպորտային միջոցը չի վերաարտահանել, չի վերահայտարարագրել մաքսային այլ ընթացակարգով:

Բացի վերոնշյալ դիմումից Էրիկ Միխայելի Խարատովի կողմից գործի լուծմների և քննության ժամանակ վարչական մարմնին չի ներկայացրվել որևէ ապացույց, ինչը կբացատրեր վերջինիս մեղքը կատարված զանցանքի մեջ :

Ժամանակավոր ՀՀ ներմուծված «MITSUBISHI-SPACE WAGON» մակնիշի, JMBLNN84WXZ002880 նույնականացման համարանիշի, CC324II պետհամարանիշի պետհամարանիշի 1999 թվականի արտադրության տրանսպորտային միջոցի՝ խախտման օրվա դրությամբ «Ներքին սպառման համար բացթողում» մաքսային ընթացակարգով ձևակերպելու դեպքում առաջանում են՝ միասնական դրույքաչափով վճար՝ 5047127 ՀՀ դրամ և քնապահպանական հարկ՝ 468000 ՀՀ դրամ:

Այսպիսով, վարչական մարմինը, քննելով գործում առկա ապացույցները, գտնում է, որ նշված տրանսպորտային միջոցի հետագա արտահանման պարտավորության չկատարման համար Էրիկ Միխայելի Խարատովի գործողություններում առկա է «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտման հատկանիշներ, ինչը հիմնավորվում է վարչական վարույթի նյութերով:

Ելնելով վերոգրյալից, ղեկավարվելով «Մաքսային կարգավորման մասին» ՀՀ օրենքի 301-րդ, 309-րդ, 332-րդ, 334-րդ հոդվածներով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ հոդվածներով՝ որոշում է կայացվել «Մաքսային կարգավորման

մասին» ՀՀ օրենքի 309-րդ հոդվածով նախատեսված մաքսային կանոնների խախտում կատարելու համար էրիկ Միխայելի Խարատովին ենթարկել վարչական պատասխանատվության՝ տուգանելով 551513 ՀՀ դրամի չափով:

3. Բողոքարկման առարկային վերաբերվող իրավական կարգավորումներ և եզրահանգումներ

«Եվրասիական տնտեսական միության մաքսային օրենսգրքի մասին» պայմանագրի 264-րդ հոդվածի 1-ին կետի համաձայն օտարերկրյա ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Նույն Օրենսգրքի 259-րդ հոդվածի 2-րդ կետում նշված օտարերկրյա ֆիզիկական անձանց կողմից՝ անդամ պետություններում և Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Անդամ պետությունների ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Նույն հոդվածի 5-րդ մասի 1-ին պարբերության համաձայն՝ ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մաքսային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման»:

«Մաքսային կարգավորման մասին» ՀՀ օրենքի 301-րդ հոդվածի 1-ին մասի համաձայն՝ «Մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն:

Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

Նույն օրենքի 309-րդ հոդվածի 1-ին մասի համաձայն՝ «Ֆիզիկական անձանց կողմից հետագա արտահանման պարտավորությամբ Հայաստանի Հանրապետություն ներմուծված անձնական օգտագործման տրանսպորտային միջոցները սահմանված ժամկետում Հայաստանի Հանրապետությունից չարտահանելը, եթե հետագա արտահանման պարտավորությունը խախտվել է ավելի քան տասն օրով՝ առաջացնում է տուգանք՝ ֆիզիկական անձանց կողմից այդ տրանսպորտային միջոցներն ազատ շրջանառության համար բաց թողնելու նպատակով ներմուծելու համար նախատեսված մաքսային վճարների (բացառությամբ

մաքսային մարմինների կողմից մաքսային գործառնությունների իրականացման համար գանձվող պետական տուրքի) մեծության տասը տոկոսի չափով, բայց ոչ պակաս, քան երեսուն հազար դրամի չափով»:

Վարչական իրավախախտումների վերաբերյալ գործերի վարույթը բացառող հանգամանքները սահմանված են Օրենսգրքի 247-րդ հոդվածով:

Քննարկվող դեպքում Հանձնաժողովը հատկանշական է համարում այն հանգամանքը, որ 14.07.2023թ. լրացված թիվ 05100033/140723/0000832111/00 մաքսային մուտքի օրդերով 9 օր ժամկետով ՀՀ է ներմուծվել վերոնշյալ տրանսպորտային միջոցը, սակայն սահմանված ժամկետում տրանսպորտային միջոցը չի վերաարտահանվել, չի վերահայտարարագրվել մաքսային այլ ընթացակարգով: Անդրադառնալով դիմում-բողոքում մատնանշված այն նկատառմանը, որ ապահովագրական վճարը կատարված է՝ Հանձնաժողովը հարկ է համարում նշել, որ այդ հանգամանքը չի կարող դիտարկվել որպես տրանսպորտային միջոցի հետագա արտահանման պարտավորությունը չկատարելու համար պատասխանատվությունից ազատելու հիմք:

Ելնելով վերը նշված իրավանորմերի դրույթներից, հիմք ընդունելով սույն որոշման 2-րդ կետում բերված փաստական տվյալները՝ Հանձնաժողովը գտնում է, որ վարչական վարույթի նյութերով հիմնավորվում է, որ Էրիկ Խարատովի արարքում առկա է «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտում և ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 01.12.2023թ. թիվ 05100033/291123/1381/6/1 որոշումը իրավաչափ է և փաստարկված:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 01.12.2023թ. թիվ 05100033/291123/1381/6/1 որոշման դեմ ֆիզիկական անձ Ալեքսանդր Կասպարովի դիմում-բողոքը մերժել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

ՀԱՆՁՆԱԺՈՂՈՎԻ ՆԱԽԱԳԱՀ՝

12/26/2023

X 

ԿԱՐԵՆ ԹԱՄԱԶՅԱՆ

Signed by: TAMAZYAN KAREN 2612840184

ԿԱՐԵՆ ԹԱՄԱԶՅԱՆ